

ولد و بنت

ولد..

من ضمن هذا الجيل
كان كل أصحابه
بس القلم والليل
يحزن ينادي الصبر
يعشق ييوح للنيل
ويشرب القهوة
ويقرأ في الطالع
كان كل أحلامه
بلكونة ع الشارع.

بنت..

داخلة على العشرين
هيّ الوحيدة النور
كل البشر من طين
تضحك فأ تحيي بلاد
تحزن فأ قلبي يُطْبُ

تشبه قوي لـ "سعاد"

في صغيرة ع الحب

ولد..

أسمر سمار البلد

لكنه قلبه حليب

بـ الحب قلبه أتجلد

لكنه لسه طيب

مجنون وله مجاذيب

وعلاجه بـ المجان

يدخله قلب الحجر

يخرج قوام إنسان.

بنت..

شابكة في ضفايرها

فيونكة طيارة

دلالتها خلى البدر

يتدارى في ستارة

ألعابها زمارة

وعروسة أنتيكا

كان السُّكَّات إزعاج

وكلامها مزيكا

ولد..

خَدها على كعابُه

كل العيال تابوا

لكنه فاضل شقي

للدنيا مد إيديه

وصرخ لها إعشقي

صَدَّقت إني هكون

مش راضية ليه تصدقي؟

لو شايقة حلمي جنون

يبقى الجنون مبدأي.

بنت وولد والغيب

والحب في الينايب

والدنيا دي دجال

صَلَّت صلاة العشق

فا إتفجر الموال

وإتخلقت النسمة

بنت وولد وقانون

إن اللقا قسمة.

مهزوزة معلشي..
جرب كان مرة..
وابعد عشان الكادر..
يجينا من برة..
صوّرنا واحنا بعيد..
وبنلعب الكورة..
صوّرنا إيد في الإيد..
رقصتنا تنورة..
صوّرنا عاملين قلب..
ونفوسنا مجبورة..
صوّرنا بس إفتكر..
كل اللي بيضحى..
مبانش في الصورة..